

TERBITNYA MATAHARI DARI UFUK BARAT

Firman Allah s.w.t :

158. ((Apakah (yang ditunggu-tunggu oleh mereka Yang tidak beriman itu?) mereka tidak menunggu melainkan kedatangan malaikat (yang mencabut nyawa mereka), atau kedatangan (azab) Tuhanmu, atau kedatangan sebahagian dari tanda-tanda Tuhanmu (yang menjadi alamat hari kiamat). pada hari datangnya sebahagian dari tanda-tanda Tuhanmu itu, tidak berfaedah lagi iman seseorang Yang tidak beriman sebelum itu, atau Yang tidak berusaha mengerjakan kebaikan mengenai imannya. katakanlah: “Tunggulah kamu (akan apa Yang kamu berhak mendapatnya), dan Kami pun sebenarnya menunggu (akan apa Yang telah dijanjikan oleh Tuhan kepada kami)”). (Al-An’aam : 158)

Dari Abi Hurairah r.a bahawa Rasulullah s.a.w. bersabda : “Tidak akan berlaku Kiamat sehingga terbitnya matahari dari tempat terbenamnya. Apabila ia terbit (dari barat), maka berimanlah sekalian manusia dan ketika itu adalah saat di mana tidak bermanfaat lagi iman seseorang yang belum beriman sebelum daripadanya dan tidak berusaha dalam keimanannya mengerjakan kebaikan” (Riwayat Bukhari dan Muslim)

APABILA TERBIT MATAHARI DARI UFUK BARAT TERTUTUP PINTU IMAN DAN TAUBAT

Firman Allah s.w.t :

85. ((Maka iman Yang mereka katakan semasa melihat azab kami, tidak berguna lagi kepada mereka; Yang demikian adalah menurut “Sunnatullah” (undang-undang peraturan Allah) Yang telah berlaku kepada hamba-hambanya. dan pada saat itu rugilah orang-orang Yang kufur ingkar)). (Ghafir : 85)

Sabda Rasulullah s.a.w : “Tidak terhenti hijrah selagi mana diterima taubat, dan taubat akan terus diterima sehingga matahari terbit dari ufuk barat. Apabila terbit (dari barat) dikunci hati-hati manusia apa yang ada di dalamnya dan dicukupkan manusia dengan amalan (yang telah dilakukan). (Riwayat Imam Ahmad)